



葉文莊公邊奏存藁卷之四

吏部左侍郎謚文莊崑山葉盛存藁

孫衡州府同知 夢淇較定

六世孫禮部主事 重華彙梓

題爲固結人心節省邊儲等事案照節節據萬全都
司經歷司呈抄蒙都御史李秉案驗該戶部奏
准將宣府各衛所相去沿邊各城堡哨備官軍
若有家小隨住者就將該支俸月糧米開於哨
備處所關支住支行糧果有父母年老不能前
去者俸月糧米仍在衛所關支哨備處所關支

行糧通行遵守知會等因查得口外獨石等八城見守官軍一萬五千有餘數內衛所居住老弱等項官軍不過七千之上河南輪班客軍二千有餘其精兵馬步軍六千有餘俱係宣府在城前等衛并長安嶺迤南保安隆慶左等衛調來哨備之人景泰五年正月分食糧案內查出前項哨備官軍六千有餘數內旗軍三千有餘俱在衛所關支月糧哨備處所關支行糧臣嘗竊求其故口外係是居庸屏蔽朝廷所必守之地而極邊苦寒東西北面不通往來止有長

安嶺往南路通保安隆慶非官府懷來通達地方者比故前項哨備軍人若止夫妻二口每月支糧八斗衣食頗足開於哨備處所支糧過活但有男女父母者支糧八斗難以贍用故單身在邊行糧過活其父母妻子存留衛所以圖月糧養贍甚至有妻子暫赴哨備處所看望而衛所即便開糧及至歸家衛所有行勘收糧之擾又有哨備軍人逃回看望父母妻子而城堡官員動受捶楚及衛所隣里百方挨捕之苦切詳前項軍人室家係念食用不周平居無事尚且

逃竄不守設若緊關而欲望其死守豈不難哉
邊方壞事皆繇於此今查得前項官軍舊例有
支糧本色一石三斗者一石一斗者累因撙節
邊儲減去至于月糧本色八斗行糧本色五斗
雖共該本色一石三斗而彼此不得兩全公私
不得兼濟若不區畫定奪非惟邊軍無固守之
心實則邊儲無節省之實乞 勅戶部從長計
議不爲長例前項口外調來哨備官軍開去哨
備處所關支父母妻子隨住若有伯叔兄弟大
口重大情願分房居住者聽照依一石一斗事

例支與本色則每一月可省本色米六百餘石
每一年可省本色米七千二百餘石如 朝廷
俯念守邊艱苦父母妻子不廢衣食量與一石
二斗支與本色則月省米三百餘石年省米三
千六百餘石其止夫妻見在哨備處所關支月
糧八斗者量添本色一斗共支九斗其前項所
添斗頭或准於折色除豁則窮軍得沾實惠且
有所顧戀得以盡心守邊而城堡免捕亡壞事
之患衛所免開收勞擾之弊邊儲有蓄積之益
誠爲利便謹題

景泰五年正月初三日

題爲陳言邊務等事照得近節該欽奉

勅比聞瓦剌也先擅自易其名號此其心已不可測矣今歲差來朝貢使臣不依往年此其奸計必有所在欽此欽遵臣惟虜酋也先中國與之所謂萬世必報之讐加以也先近來篡殺其主脫脫卜花王殺戮之慘及於骨肉自古僭逆如亡金亮者渝盟於宋兵號百萬南侵其母諫止殺其母以威衆然不久卒爲其下所殺今也先之惡不在亮下反狀已具必有侵犯之謀天道禍淫豈

無滅亡之日顧吾所以應之者何如耳則夫內政之脩治外邊之整飭貢使往來經久計慮

皇上其可不慎重而加之意哉前年春也先遣使以

旣殺脫脫卜花王報知 朝廷臣在兵科亦曾

上言正恐大義若不昭明大惡無所忌憚芻蕘

之言已蒙留納今照虜使在京將還調劑區處

之術謹始圖終之道坐令國勢崇嚴虜心嚮附

朝廷必有廟謀神斷臣不敢妄議然犬馬之忠

竊復以爲堂堂天朝完如金甌養兵養士將及

百年忠義材勇豈無其人雪耻除兇必有其日

又况中國之於夷狄亦如正道之於異端撫馭之道不徒在於攻擊要在脩其本以勝之伏望皇上德愈隆而益求其隆敬已至而益求其至從天叙以迓天眷察人言以收人心無益之事既絕矣而常防其源講讀之功既勤矣而力至其極而又進君子而退小人斥陰邪而獎忠直闔外之任求如吉甫如孔明立朝之士求如張仲如稭允覈實賞罰蓄積錢糧責之守臣軍強馬壯戰勝攻取責之將帥嚴守禦以爲終歲之常熟戰陣以備一時之用來犯則弗釋既去則弗追勿使開募致兵勿貪近功小利上下一德內外一心如此則雖百也先復何爲哉虞書有曰無怠無荒四夷來王又曰在知人在安民知人則哲能官人安民則惠黎民懷之能哲而惠何憂乎驩兜何遷乎有苗何畏乎巧言令色孔子其此之謂歟不然非臣所知也惟

皇上留神省察天下幸甚再照今年也先等進貢使臣不從往年大同宣府大路乃分道兼進大爲非便臣與都御史李秉會議備陳利害具奏外乞勅該部查照諭以常年入貢故道使之遵

守仍行大同宣府如口外馬營所收弓箭俱送
宣府候原來使臣交割出境仍乞通行請 勅
也先今後務遵舊規戒約部屬凡有進貢仍從
大同宣府大路入境如仍似今年各衛部屬各
因所住地方入境卽係背約意在犯邊已令邊
將俱不放入止知按兵廝殺而已仍乞 勅各
邊知會遵守施行臣職守邊方義難隱默謹題
景泰五年正月十五日

題爲軍務等事照得先節該欽奉

勅諭軍中一應奸弊爾須嚴切關防痛加禁約毋令
下人賁緣作弊及纖毫科擾軍士私占役使有妨
操守如違聽爾劾奏處治爾其欽承朕命欽此欽
遵景泰五年二月二十二日臣公同監察御史
章亮給散長安嶺迤南墩臺賞賜銀兩間准鎮
守副總兵孫安手本爲地方事開據守備雲州
都指揮沈禮等呈稟本月二十日抄蒙內官弓
勝鈞帖仰沈禮等卽查原在韓內官下種田軍
人撥與總旗樊名同本堡軍人韓得辛管轄種
田其撥過姓名呈來知會等因臣切惟今日各
邊各關軍中奸弊固多而莫大於管事官員私

占官軍廣種庄田一事即如口外八城堡比之
 各邊尤號艱苦兼之新經復守瘡痍未瘳官軍
 上下衣食不給若使管事官員稍能撫恤令其
 休息牧放屯種之時各自經營生理養活家口
 庶幾銳氣可生戰心可鼓第往年無事之先總
 兵鎮守内外文武官員專一役占官軍廣種庄
 田多至于餘少亦百數守墩臺者不及看莊出
 餽者之多執犁鋤者不比操弓演箭者之少附
 近肥饒地土盡屬官豪寫遠沙薄山崗纔及軍
 士軍士不惟無力可種亦無暇得以自種即年

豐歲稔而窮軍下人未免有啼饑號寒者大官
 巨室千倉百廩繇是而應召納粟則關給官銀
 糶與鹽商則多沾重利無非供苞苴賄賂之用
 益子女玉帛之娛不顧剝削軍士之脂膏耗損
 下人之氣力以此銳氣日減怨氣日增一遇緊
 關人心渙散禍胎病源已非朝夕矣臣前年初
 到口外之時為見此弊盡將各官舊日莊田踏
 勘查出派與領養官牛軍士又得都御史李秉
 建言申明整飭屯種即今又嘗會議於各處拒
 敵墩堡每處量撥官牛三具就撥近堡田畝令

守堡官軍且耕且守以固邊備今該前因叅照
 弓勝受 朝廷之厚恩當邊方之重寄不圖報
 國惟務身謀敢弄貪縱機關甘蹈前人覆轍營
 幹私事役占軍人不知旗軍樊名韓得辛等俱
 是食糧官軍近又 朝廷賞賜銀兩即今虜情
 不測傳聞草青馬飽四五月間必來犯邊乃
 朝廷養軍之心弓勝不知今日邊關之事弓勝
 不理日惟着落將官撥軍管庄種田且弓勝見
 在獨石居住却乃遠往雲州置立莊田則獨石
 莊田不言可見玩法欺公全無忌憚成法具在

重典難逃再照樊名韓得辛等親管頭日不能
 鈐束以致各軍投託管莊種田俱合有罪乞
 勅該衙門行令巡按御史將弓勝拿問明白治
 以重罪警戒將來其獨石雲州都指揮等官張
 林張傑沈禮陳忠等查照各軍是何官屬若有
 故縱實情通行拿問發落庶使貪污知懼奸弊
 永革謹題

景泰五年二月二十三日

題為急缺邊儲事照得口外獨石等八城堡先年
 捐棄之時積有糧料柒拾萬有餘棄毀無存復

守以來都御史李秉與臣已嘗節次具奏伏蒙
朝廷設法措置轉輸可謂至矣今於三月初五
查據八倉報到見在料糧止有伍拾餘萬石目
下又放四月分糧料畢日已不及伍拾萬之數
卽如馬營極爲緊要地方本倉先年棄毀糧料
二十一萬有餘今止有九萬一千有餘儲積多
寡昭然可見今看得各倉新舊節次開中淮浙
長蘆鹽糧俱已報完爭先上納雖納至月中可
以盡絕然會計糧料數亦不多緣今各邊節報
聲息四五月間逆虜要來犯邊而口外地方又
非各邊之比深山峻嶺孤懸在外一有邊警道
路梗絕臣叨受邊寄若不先事再言一旦警急
糧餉缺乏軍馬疲困雖有高城深池能無悞事
此時言之罪將何道伏望

皇上軫念窮邊 勅諭該衙門從長酌量計議或設
法僨運或將下年鹽課量爲開中別爲轉輸長
策以爲足邊固本之謀豈唯臣區區之幸臣不
勝惓惓

景泰五年三月十二日

題爲緊要邊備事據守備雲州堡都指揮沈禮呈

云 具呈得此會同副總兵孫安協同都指揮
周賢議得口外八城堡內長安嶺鵬鶚二處正
係居中大路南接懷來保安往年達賊經行卽
今使臣來往皆繇於此其雲州一處緊抵獨石
馬營往年失事此爲最先口外屯聚軍馬固爲
不多而三處尤稱數少雲州本城官軍除墩堡
差占實在止七十餘名而本城垛口計有三百
六十鵬鶚本城官軍除墩堡差占實在止一百
餘名而本城垛口計四百餘長安嶺本城官軍
除整堡差占實在止一百二十餘名而本城垛

口計有九百九十有七前項官軍城堡分守尚
且不足出戰不言可知況且長安嶺鵬鶚二處
城垣未曾磚包目下方行僱工因將河南備禦
官軍雲州撥四百餘名鵬鶚撥六百一十餘名
長安嶺撥五百餘名相兼守備併做工程然各
軍單身獨力春來秋去旣無顧戀豈能固守而
前項地方委係緊要必守去處若此處設備嚴
固則腹裡地方方可無虞往年獨石馬營等城
俱係修理堅完樓櫓壯固倉儲廣積器用全備
又有精壯官軍帶有家小分投守備遇警尚且

捐棄今該復守凡事不及往昔况今賊寇在邊
不遠變態難測似此官軍城堡實爲可憂臣等
智慮短淺弗稱任使若不先行懇言增添軍士
迨至誤事獲譴于 國何益如蒙准題乞 勅
該部從長計議合無將腹裡軍多衛所軍人連
家小發來補實前項三處城堡惟復將今後問
擬充軍囚犯各連家小送臣等處轉發各堡收
管着役待後軍多之日雲州另設守禦千戶所
或隸之開平衛其鵬鶚長安嶺軍人俱屬懷來
衛中千戶所俱係萬全都司管轄卽于本處推
選官員管領屯操守戰庶使邊境得以固守國
事有所裨益謹題

景泰五年三月三十日

題爲邊務事照得先該都御史李秉奏稱副總兵
孫安病未全愈該兵部官議擬奏准行委都指
揮周賢協同守備獨石等八城地方緣今虜情
變詐之際早晚出戰之時若不請乞

上命使之遵守奉行非惟難責成功猶恐因而誤事
所據臣與孫安先受制諭合無再與增添頒給
惟復請 勅周賢令其常川往來八城地方

專操練軍馬脩理器械申嚴號令整飭行伍務
要士氣激昂馬匹臚壯衣甲鮮明矢刃銛利一
有邊報卽與臣等計慮籌畫如果堪可出戰勦
殺事出萬全隨卽統領所部官軍聽其節制以
破逆賊以取成功謹題

景泰五年五月初四日

題爲緊要邊城缺官事照得口外雲州堡地方最
爲極邊獨石馬營內援所在十分緊要近又奏
准撥去編發軍犯數多平居防範一日不可缺
人設有不虞事體尤爲甚重今照本堡都指揮

沈禮協同指揮陳忠近爲聲息事已行巡按御
史提問况沈禮先因年老具奏未蒙准理今又
爲事難再任用會同副總兵都督孫安等計議
得前項城堡缺人合當急爲措置看得赤城隨
操把總王榮龍門所協同指揮沙泉俱各年力
相應曾歷邊事堪以守備協同雲州堡管事及
看得王榮原領官軍二百餘員名合就併與隨
操把總指揮吳昇管領乞 勅該部計議行令
各官管事施行庶得地方不致缺人任用允爲
停當謹題

景泰五年五月二十三日

葉文莊公遺集卷四

葉文莊公邊奏存藁卷五

吏部左侍郎謚文莊崑山葉盛存藁

孫衡州府同知 夢淇較定

六世孫禮部主事 重華彙梓

題爲雹雨打傷田禾事據守備雲州馬營等堡都
指揮等官沈禮張林等呈依奉親詣本堡地方
原撥屯軍種過田畝并各拒敵屯堡被傷田禾
處所從公逐一踏看今將雹雨傷重并泥淤無
根苗應該翻種并傷輕應該存留各色田禾頃
畝數目開呈得此案照先據各官呈據管屯指

揮等官張琥等呈該軍人張珪等告稱先蒙差撥本堡軍餘照依撥到土地領給官牛前去原派地方趁地耕種卽今五月將終各色田禾俱已茂盛不期本月二十三日午時分忽被暴風驟雨冷霧大雹傾下至酉時分方止平地起水并冷冰約有三尺餘深至雨罷前去履畝周圍逐一踏勘所有各色禾苗俱被打傷滄澇淤死根苗無存除高岡頗有些須十不及一亦被水衝係于官撥地上牛種秋成上糧見被災傷告乞轉達定奪便益據告具呈得此爲照雖稱前因未委輕重虛實及照卽日正係佈種蕎麥之時前項田禾若是委被雹傷尚可翻種蕎麥已經通行定委守備等官躬親前詣被傷田禾處所逐一踏勘翻種回報去後今呈前因審勘是實除再通行着落各該官員將勘實被災傷重并淤衝無存田苗共一十八頃九十九畝用心翻種蕎麥務臻成效外謹題

景泰五年六月初 日

題爲請乞醫士事臣以迂疎叨忝任使奉命於口外獨石等八城管事緣臣夙稟孱弱每罹疾疢

窮荒絕漠之地既無藥餌又乏醫家如赤城都督孫安等處雖有醫士而雲州馬營龍門衛鵬鶚長安嶺等五城俱無然各城軍馬錢糧動以萬計巡歷整理不敢稽違往來之間未免有醫藥不便之苦及照前項五城中間且如雲州一城係近日奏准收發新軍并脩守犯人數多去處臣近日巡歷本城點視軍犯中間患病不能行履者四十餘人蓋緣前項軍犯俱係新近編發憂愁困苦貧窮凍餒及南方不服水土之人兼無親識看視亦無醫藥治療奄奄氣息坐待

死亡如此等人尚不能為平居之用安望其為戰守之資深可哀矜亦當計慮為此除行令守備官員設法採取本處產出藥材易換別味就於本城藥房收貯及選取軍餘習學方脉外伏望 聖恩憐憫特命禮部行撥精通方脉醫士一名前來臣處整理醫藥如臣平復就令於雲州等城堡缺醫去處看治患病官軍及教習軍醫應用照例半年給藥一年一換施行如此豈惟愚臣一身感激大恩凡窮邊之人得保天年而無枉死傷生之患者皆我

皇上天地父母之德也謹題

景泰五年七月十八日

題爲脩守犯人冬衣布花事據守備獨石等城堡都指揮張傑等呈備開平等衛鎮撫呈該劉敏等各告係爲事犯人在京發來開平等衛所帶管脩守上年得蒙給賜冬衣布花禦寒穿用存活性命今奉明文不准今年關給各人思得雖是犯罪發來見蒙撥去輪流守瞭墩臺下班又蒙撥隨伍做工口外苦寒地面無人供送盤纏衣鞋破碎十分單薄一交冬寒仍恐凍死乞爲

轉達照依上年事例關給布花便益等因備告具呈得此案查近承准總督邊儲右僉都御史李秉照會准戶部咨稱河南山東連年水旱該徵布花停免數多況邊庫收貯有限各項支用無窮誠恐缺乏不無悞事緣前項犯人雖稱與同官軍一般瞭望先已違法犯罪於理正宜及照上年給與布花係是奏過不爲常例難再給與等因備行承此已經通行去後今呈前因會同鎮守都督同知孫安等議得前項脩守犯人委與正伍旗軍一般守瞭墩臺脩理城堡不得

休息又無家小隨住極爲苦楚兼之口外地方十分寒冷較之宣府已是不同比先正因各犯例無冬衣布花止支口糧三斗以此節次轉達艱難實情荷蒙 朝廷厚德准令支糧四斗上年關布一疋花八兩救濟饑寒得全性命不勝幸甚今年又因雲州軍少奏准將新軍并前項犯人收發備禦臣等近因公幹到彼親見新來軍犯上無衫襦下無禪袴形體瘦削與死爲隣若無冬衣布花交冬必致凍死況且前項犯人僅止千人其數不多伏望

皇上憐念窮邊孤苦乞 勅該部計議將前項脩守人犯照依前例每名仍給綿布一疋綿花八兩以禦冬寒以養銳氣遇警與同官軍併力殺賊以圖補報實爲便益謹題

景泰五年七月十八日

題爲軍中興學事洪惟 聖朝祖宗以來最以興學爲重天下有司既有儒學矣慮武臣之一於武而不能兼於文也爲置武學焉置衛學焉又慮間巷邊徼之不能皆有學也又命置社學焉良法美意愈久愈光迨我

皇上中興撫運文德誕敷平定之餘尤重斯典是以四方萬國文武之材屢見迭出亦旣盛矣今照臣近因整飭軍務出巡往往諮詢問難軍職官舍人等多有全不識字者弓馬勇力雖出天資方畧謀猷終寡學識已往者旣不可及方來者可無教乎及照口外獨石等八城先年止有獨石城有廟學一處見存當時朝廷設置除授學官教育生徒軍中子弟累有魁經領薦之士所謂天降時雨山川出雲所謂何地不生才所謂十室有忠信理固然也今欲照舊興舉但緣

一則朝廷因念邊備裁革邊方學官未久未敢煩瀆一則獨石止是一隅雖有學官而各城亦不得兼通利便臣愚欲照社學事例每城隨其大小量撥官房各置社學一處公同鎮守守備等官就于各城內推舉年高罷閑致仕或守城項下官員或軍人等項及曾繇科目仕宦過誤遷謫卽今才行可取文學優長者一人爲之師其官軍之家一應弟男子侄舍餘人等但有屯操餘暇工夫情願入學讀書者許其入學每日授讀小學四書孫吳等兵法并習寫字爲之

師者教訓講解開諭化導語以忠君孝親親上死長之道脩已治人之法及朝廷儲養作興以期文武全才之意使之感激奮勵夙夜盡心所學他日居官任事皆爲有用之材中間果有能習經學願應科舉者照例准令起送如此則因人用才而不廢糧賞隨地有學而可收成效朝廷興學禮典顧不偉歟除行整理外乞勅兵部禮部照詳定議行令管理軍務并巡按布按二司等官經過去處躬親考較求其實効責其成功庶幾奉行無闕經久不廢謹題

景泰五年八月初八日

題爲邊務事准宣府副總兵都督同知孫安等手本准後軍都督府咨准兵部咨呈兵科抄出巡按直隸監察御史張鵬題切照口外鵬鶚北接龍門千戶所南抵長安嶺西連赤城東臨狄境正係達賊出沒緊關要害之地頃刻不可乏人操守訪得守備本堡都指揮僉事申義久患風病不能動履今止協同指揮姚瑄一員管事萬一有警誠恐缺人調度軍馬臨期有悞軍機未便乞勅兵部於在京各營帶操都指揮內選

調年力精壯熟于戰守者一員前來代替申義
仍將本官送回都司養病痊可之日照舊帶俸
差操庶使操守得人邊方有備具題景泰五年
七月初七日奏奉

聖旨兵部知道欽此欽遵抄出到部參照奏稱守備
鵬鶚堡都指揮申義久病不能動履要於京營
差官代替一節緣在京各營都指揮等官俱係
選撥十營操練聽調及領軍放班公差等項數
多急無相應官員堪以那調代替及照鵬鶚堡
係是衝要邊境卽日聲息警急守備爲重非得

諳曉邊境之人安得濟理軍務今申義旣已久
病合於彼處另舉相應官員代替爲當就行咨
呈該府轉行宣府副總兵都督同知孫安等公
同右叅政葉盛於本處見操管事并帶俸隨操
官員內推舉年力精壯曾經戰陣諳曉邊務善
撫士卒都指揮或指揮一員令其前去本堡更
替申義回還督令醫治隨操如果久病不堪差
用公同看驗是實行令該衛保送應襲兒男赴
部襲替母得指此爲繇因而希求管事自取罪
累仍將推舉過官員徑自開具職名回奏定奪

施行咨呈到府移咨手本前來准此會同都督同知孫安等看得鵬鶚堡委係緊要邊城爲照本堡城垣俱係石壘不爲久計已經行仰守備都指揮申義協同指揮姚瑄燒磚包砌卽今已完三分之二正在用人成事之時今該前因除帶操都指揮口外查無及醫治申義另行外看得永寧衛指揮陳忠先在雲州堡協同爲事被提臣等爲照雲州一日不可缺人又數內守備都指揮沈禮年老難以任用已經具奏委官代替管事今照沈禮等俱該巡按御史問擬杖罪運米復職數內沈禮年老已令襲替其陳忠見今復職歷俸緣本官先年李家庄兼操曾包本處城垣近年雲州堡協同又包本處城垣多効勤勞深知緩急撫恤軍士得其歡心又兼年力精壯弓馬慣熟累經跟同前總兵官楊洪等出境殺賊自立戰功歷陞前職口外指揮官員鮮有出其右者本官守備前項城堡於事體相應於地方有益乞勅該部行令指揮陳忠守備鵬鶚堡與協同指揮姚瑄同心一力管事以脩未了城垣以爲將來堡障便益謹題

景泰五年八月初十日

題爲請乞醫士謝 恩事照得臣近因自惟多疾
及因雲州等城官軍等項患病數多缺欠醫藥
請乞醫士前來跟臣整理醫藥并往來雲州等
處藥房看治患病官軍等因其題欽蒙 聖恩
俞允差撥醫士吳安將帶藥餌於景泰五年八
月二十二日到來辦事查得近該雲州城報到
卽今患病官軍男婦一百三名口除令吳安前
去看治外謹具奏稱謝者伏以天地萬物爲一
體允惟仁者之心 聖人一視而同仁上合天

心之妙茲蓋伏遇

皇帝陛下躬成湯祝網之大德履周文堊骨之至慈
有如愚臣質比草茅叨忝邊人之上官軍人等
材惟甲冑征行敵境之中每慚末役之空疎敢
慕洪恩之眷念名醫特下良藥與俱發政施仁
初無間於遐邇博施濟衆端有繫於死生喜氣
彌天歡聲動地生死骨肉知結草報恩之有人
文恬武嬉冀折馘收功于不日臣無任感激抃
蹈之至謹具奏稱謝以 聞

景泰五年八月二十五日

題爲邊務事景泰五年九月初四日承准兵部照會該本部奏准該宣府鎮守等官奏保見在柴溝堡守備都指揮王林驍勇敢戰可當一方要將本官代替今充宣府叅將都指揮張林守備馬營等因具奏爲照馬營等處係臣等所管地方查無臣等會奏緣繇行令從公體勘王林有無前項才能應否代替守備如果堪以委用明白其實開奏以憑定奪等因照會到職會同副總兵都督孫安等勘議得馬營正係緊要邊方卽今又係緊關時月今宣府鎮守提督總兵等官會保王林前來代替張林守備臣等訪得王林委的才堪任用允如所保乞勅該部行令都指揮王林代替張林前來馬營守備便益謹題

景泰五年九月初四日

題爲邊務乞留官員保障邊人事據西猫兒峪馬營堡開平等衛指揮千百戶等官并旗軍王鐸等連名呈告切照本營守備都指揮張林自景泰五年四月二十二日奉勅守備本營操練軍馬切思本官性資鯁直撫士多方外貌堂堂

中心烈烈尤且歷邊年久深知邊情地利撫下
咸得其宜人皆欣服不勝感仰咸忘邊戍之勞
俱樂雍熙之治可謂 朝廷邊圉之得將臣也
伏聞欽調本官別用合城官軍老稚無不驚訝
號泣若喪考妣如蒙准呈轉達乞留本官仍前
提督本營不失邊人之望不勝感戴爲此具呈
乞爲憐憫轉達施行等因到職行間隨承准兵
部照會該鎮守宣府等官題稱柴溝堡萬全左
右懷來蔚州衛地方緊要守備必在得人看得
馬營守備都指揮張林熟於戰守嚴於紀律素

有聞望人心畏服乞將本官量加副將名色更
代都督江福守備往來提督前項衛分等因題
奉

聖旨兵部知道欽此又該總兵官過興等并總督都
御史李秉會同巡按御史張鵬俱題前事該本
部叅看得合無准擬請 勅張林令充宣府右
叅將前去萬全右衛代替江福等因題奉

聖旨是欽此欽遵照會到職除欽遵外叅照守備馬
營都指揮張林旣已宣府鎮守提督總兵等官
連章合辭舉保欽准加充將官名目提督管事

恩命未至而馬營官軍訪聞宣府奏保連名合
辭稱道張林善處要乞轉達保留兼且情詞懇
切聞者感動雖 聖斷已定恩命已行難以乞
留但王鐸等連名呈告憐憫轉達一節一則可
見張林平日爲將有以服衆及人一則可見王
鐸等平日事上有以好賢服善兼此二美可勸
多人激勵作興所繫非小爲此除行獨石等八
堡守備協同等官并指揮王鐸等及行欽差宣
府口外鎮守提督總兵守備等官并右叅將張
林知會外謹題

景泰五年九月初四日

題爲邊務事照得龍門衛係緊要邊方守備協同
不可缺人今照協同守備指揮孟桓見今年老
令男孟瑄替職缺官協同會同副總兵都督孫
安等計議看得赤城隨操把總指揮同知吳昇
年力精壯弓馬慣熟堪以協同都指揮黃瑄守
備及看得赤城管操指揮杜旺宣府指揮鄭友
邇年在邊深知賊情合將各官代替吳昇分管
原領官軍指揮杜旺管領萬全左右二衛官軍
指揮鄭友管領本衛官軍操練聽調庶爲允當

謹題

景泰五年九月

日

題爲撥制攪擾邊務等事景泰五年九月十二日
酉時准承兵部照會前事云云備行承此叅照
內官弓勝都督孫安專弄口舌彼此不和衆所
共知已非一日今該前因訪得羅榮委係平昔
行止不端之人曾跟內官弓勝寫發所爲未善
理有必然及訪得都督孫安近因聞得獨石軍
人陳別四掘得木桶內官銀四十餘個不得收
用要調各軍審問下落而弓勝手本回稱亦有

雲州軍人陳車頭等先年獲到散賞給事中金
達所賚被賊驚散官銀八錠首送孫安處亦無
下落以此抵當挾制將軍伴陳別四等不發守
備官員回稱弓勝不肯發下無從呈送等因臣
惟弓勝孫安俱係 朝廷內外重臣遇有前項
首送埋藏遺失之物自合公同計議或該送官
或聽收用却乃互相隱匿以致下落不明引惹
釁端交鬪口舌及照孫安係受制諭官員調取
軍人而守備內外官員回稱不發則是孫安已
失總戎之體已乖馭衆之方設若警急動調軍

馬時刻不可遲慢事情而兩人似此各持私忿
一則強梁不發一則號令不行其爲悞事何可
勝言今照向來正因各官不和 朝廷已經兩
降璽書令其改過其奏詞 旨意切責戒飭之
言又經數次近因查照兵部奏准事理禁約不
許差遣官員赴京奏事始得是非稍息昨者又
因臣與右僉都御史李秉會奏 朝廷又降璽
書令其脩省奈

皇上言之諄諄而各官聽之藐藐

璽書纔降爭討

又輿況內臣邊將處處有之何獨弓勝孫安乃
敢故爾不肯畏法尊 君不義不忠無廉無耻

上負 朝廷委託下失將士觀瞻冥頑之徒誠

爲可惡今若止是懲治羅榮等輩而於各官不

爲務本之區處不作經久之計慮則是弓勝孫

安猜忌愈重嫌隙愈深視爲尋常恬不知改平

居無事不時被其攪擾倘遇警急又有莫大之

憂直至壞事而言於事已無補益兼之跟隨弓

勝多係比先寫本寫狀發來充軍之人如李世

榮韓俊等不守本分臣累曾行取問斷懲治柰

此輩違順不常出沒難保又且弓勝瑣碎頻煩

尚氣自用其作爲行事率意任情不必全靠寫發之人也除行查勘羅榮充軍着役月日伊男羅瑛是否與父一同寫發及拘陳別四陳車頭等審問銀兩數目虛實下落另行外乞 勅兵部都察院計議行令巡按監察御史將弓勝孫安并羅榮重加懲治以爲邊方內外官員方命不和之戒其隱匿費用入已官私銀兩追送入官糴米足邊仍乞

聖斷念弓勝爲貴近之職孫安有脩復之勞早爲處置各官使之各得保全名位亦免他日致壞

國家大事臣叨受委託邊方事重不敢不言謹題

景泰五年九月十三日

題爲軍務等事照得口外獨石至長安嶺八城堡地方原有都督同知孫安充副總兵鎮守臣盛協贊軍務分守赤城都指揮僉事周賢協同守備分守獨石俱各不妨往來各城堡管事孫安與臣原奉 制諭一道周賢原奉 勅諭一道近該孫安患病回京已將 制諭賫繳訖今照欽命周賢代替孫安充右叅將提督守備仍在

赤城指揮同知吳良代替周賢協同守備仍在
獨石所據守備內官黃整內使陳莊原奉 勅
書并臣原奉 勅諭俱係孫安等姓名在內有
礙公文行遣及周賢與臣等未蒙換給 制諭
吳良未奉 勅諭誠恐緩急之間誤事未便乞
勅該衙門將黃整陳莊及臣原奉 勅書并
勅諭更換請給及照例周賢等換給 制諭
吳良請給 勅諭各得欽遵奉行謹題

景泰五年十一月二十四日

奏爲陳言 聖學事臣聞宋儒真德秀有言大學

一書聖學之淵源治道之根柢而君天下者之
律令格例也爲人君者不可以不知大學爲人
臣者不可以不知大學故嘗推行其義作爲大
學衍義一書其間帝王爲治之序爲學之本道
術人材治體民情靡不備具以致崇敬畏戒逸
欲謹言行正威儀重妃匹嚴內治定國本教威
屬大綱細目本經援史叅以先儒之格言益以
忠愛之正論凡人君所當知之理所當爲之事
盡在此書字字著龜言言藥石後雖有作無以
加矣百世不惑至今傳焉況其卷帙簡少易於

歲月用功非如群經諸史一時難以徧讀伏惟
皇上親政中興天下仰德所謂無一日不親近儒生
無一日不講劇道義

皇上誠有之矣然臣愚竊謂道無終窮學無止法自
古聖賢之君未嘗不以典學爲先務之急況以
皇上春秋鼎盛正養德進學之時上項書籍所當留
意臣愚欲乞

皇上於每月經筵及每日早儒臣進講五經四書資
治通鑑之外再於每日午朝之後未申之間裁
決政事之餘不問寒暑定立日程擇端良純實

文學近臣更番人直仍兼同師保重臣入侍左
右進講此書一堂之上難疑答問終卷之日周
而復始心領而神會之身體而力行之或措諸
事或警諸心或謹其始或圖其終其於 聖躬
治道必有裨補臣又伏覩五倫書所載

太祖皇帝嘗命侍臣書此書於新城內殿兩廡壁間
曰前代官室多施繪畫予用此以備朝夕觀覽
豈不愈於丹青乎及聞之故贈太師楊士奇云
今宗皇帝監國之時常於翰林院取閱此書卽命翻
刊間賜臣下此又

皇上祖宗家法尤當留意臣愚欲乞

皇上特詔近臣檢會上項書版或新別翻刊模印完
全賜及羣臣將見朝行之士欣戴 聖恩感化
善道賢良加勉儉邪革心可以使知勉輔之方
可以使變中常之質亦足以表古人爲君爲臣
皆不可以不知大學之深意

皇上盛德垂之千萬年之遠而無窮矣茲蓋伏覩
皇上自登寶位以來言路大開近日尤爲盛美或言
脩政立事之方或言安夏攘夷之策此足以見
皇上之有以來言者而言者之足以允副

皇上而無負矣窮邊聞之不勝慶幸臣切以爲 朝
廷者天下之本 朝廷之上君臣之間一德一
心以立其本則天心效順人心感孚庶事可不
勞而自理夷狄可不戡而自服故臣迂闊之見
犬馬之忠復欲以 聖學爲

皇上獻焉然亦非臣私言求治不如正君規過不如
養德先儒程頤氏之言也臣自違侍從職分之
外不敢輕易他有塵瀆茲者蒙 恩授以邊事
凡所陳請多見俞允然皆瑣細事功之末無以
爲美官厚祿大藩重任受 恩之報以此區區

愛戀不能自己復進狂言伏惟 聖神留意迹
遠言近無任兢惕之至若夫不學小見之人謂
臣有出位之嫌加臣以希進之毀臣不復有所
辭避也具本

景泰五年十二月

日

葉文莊公邊奏存藁卷五

葉文莊公邊奏存藁卷六

吏部左侍郎謚文莊崑山葉盛存藁

孫衡州府同知 夢淇較定

六世孫禮部主事 重華彙梓

題爲鎮守巡撫等事案照先據萬全都司經歷司
呈前事該抄蒙右僉都御史李秉案驗該少保
陳循等題稱各處鎮守等官暫止議事有同方
面等因該會官計議奏准各處鎮守總督提督
叅贊協贊軍務文職自遼東至大同一年一次
俱於景泰六年四月初一日到京議事等因抄

賁轉行欽遵到職欽遵案候間今照臣先於景泰三年三月初六日蒙恩陞除山西布政司右叅政本年五月初十日到任隨往大同宣府等處管事本年十一月初九日欽奉勅諭令於獨石馬營等處協贊軍務今該扣至景泰六年四月初十日連閏該歷三年考滿例該赴京給繇緣臣亦係協贊官員而考滿日期與議事日期相近若不預先請乞定奪遵守奉行誠恐臨期有悞未便伏乞

聖裁臣合無照依協贊事例於四月初一日到京議事就於初十日考滿給繇惟復另行給繇謹題景泰六年正月初十日

題爲勦殺達賊事景泰六年正月十四日准總兵官過典等手本爲孤探聲息等事據原差出境夜不收官軍百戶劉安祥等孤報瞭有達賊近邊等因手本行移到職照依兵部奏准事理遵守再行選差乖覺夜不收哨探的確行事及令臣再選官軍五百餘員名與左叅將夏忠官軍五百餘員名俱整擗齊備策應等因准此會同內官及右叅將計議分作兩路出兵及依先次

提督軍務等官會議事理斬殺賊徒之際對敵
之人聽令盡數斬殺不許爭論首級致悞殄滅
其老弱婦人幼小子女俱要生擒通行號令將
士依期會合殺賊數內黃整周賢將領官軍一
千五百餘員名從干營兒紅山兒瓦房溝等處
堵塞險要去處指揮王鼎等將領官軍五百員
名從獅子溝順路巡哨俱約于議事臺會合本
月十五日據原差哨探夜不收官軍千戶袁能
等回報瞭有達賊人馬在于龍王堂瓦房嵯二
處往來駐劄照得臣等人馬已在境外切近賊

人駐劄去處當卽分調輕騎一千餘員名分佈
外首緊要處所暗伏據險指揮王鼎等原領官
軍五百餘員名臣原領都指揮王林鄭祥等官
軍五百餘員名共一千餘員名俱於本日夜分
投前去龍王堂瓦房嵯暗伏至十六日卯時報
有達賊不知數目仍在龍王堂西順路駐劄王
鼎王林鄭祥官軍人等向前各賊將官軍百戶
周欽等傷重各官軍奮勇當先交鋒廝殺至巳
時分殺敗賊衆生擒賊人一十三名斬獲首級
五顆收獲到賊馬三十二疋其餘賊人奔命逃

遁山林緣山險樹密恐有埋伏不曾追勦臣先
領官軍五百餘員名防護擒獲人馬回還遇有
左叅將夏忠策應官軍一同入境周賢黃整候
至本日未時分據原差指揮吳昇與同夜不收
戚雄等報說哨探直至紅塘口不曾瞭見宣府
官軍及瓜無聲息又兼陰霧雪深難以久住收
兵於本日夜仍從原出厦兒嶺門前後俱各全
軍人境臣等審據見獲賊徒係是兀良哈殘寇
叅照此賊爲也先腹心爪牙爲患已非一日
朝廷恩德招撫不從又令其於二百里外牧放
不許一人近邊致有巡兵勦殺今復近邊爲惡
如宣府張家口趕殺出哨夜不收俱是前項賊
虜茲者罪惡貫盈人怨天怒致被殺獲此皆
朝廷威力所致除將生擒賊人并斬獲首級馬
疋軍噐等項另行開坐謹題

景泰六年正月十七日

題爲抗拒不服毀罵內臣等事景泰六年正月二
十四日酉時承准兵部照會前事內府抄出欽
差守備奉御黃整題節該欽奉 勅臣守備獨
石兼管領神機銃砲往來馬營雲州提督官軍

操練欽此除欽遵外臣見年節在邇誠恐各堡
官員遇節嗜酒悞事於景泰五年十二月十六
日親臨馬營操練人馬因見官軍數少隨取各
隊手本看得協同指揮王鼎名下役占軍人五
十二名把總管步隊指揮劉俊手本內開軍伴
一百五十四名不開跟隨是何官員顯是朦朧
作弊欲將本官依軍令處治不期王鼎劉俊抗
拒不服毀罵奔走去訖若不具題誠恐下人做
倣遇有警急難以調度乞將王鼎劉俊拿送法
司明正其罪以警其餘查得馬營原有內臣守
備仍乞照舊推選能幹太監一員前來馬營鎮
守禁革奸弊爲此具本景泰五年十二月二十
一日奉

聖旨兵部知道欽此欽遵抄出到部參照所奏前緣
獨石馬營等處地方達賊犯邊所在城池俱各
捐棄不守該本部節次議奏欽命文武內外官
員前去將驚散官軍人等收集逐一脩復迄今
四五年來城堡頗已堅完守具漸有次第及照
獨石等處已有奉御黃整提督龍門一帶又有
內使陳莊守備而赤城等處見有參將都指揮

周賢提督守鎮右叅政葉盛協贊軍務其名該
城堡俱有奏定都指揮分投守禦數多若於馬
營再差太監一員前去鎮守非惟欽差官員太
多下人難於承奉抑恐彼此矛盾邊務因而廢
弛矧今邊報未息瘡痍未瘳凡事樽節減省猶
恐衆情不堪若再生事更張是豈備邊良法所
奏難准其稱馬營協同指揮王鼎把總指揮劉
俊役占軍人軍件朦朧作弊抗拒不服處治一
節合當查究合無行移都察院轉行巡按直隸
監察御史將指揮王鼎劉俊逐一查提到官明

白鞫問有無役占軍人等情如果所犯是實徑
自依律照例發落仍拘出所占軍人着令操守
若有別項情繇具繇回奏景泰五年十二月二
十三日奏奉

聖旨是所奏指揮王鼎等一面詞不必拏問行文書
去與葉盛體勘明白奏來處治欽此欽遵合就照
會前去照依奏奉欽依內事理欽遵體勘施行
承此除欽遵外案查先據守備馬營都指揮使
王林呈爲挾私陷害等事准本營協同指揮王
鼎手本前事照得本職輪該景泰五年十二月

十六日前赴赤城發放於十五日晚前去不期有欽差內官黃整於十六日到營有都指揮王林隨差指揮張順等管領官軍迎接到城下馬隨問王鼎緣何不來接我有王林回說赤城發放未回有本官言說我前日差百戶王鑑來討軍人譚俊等六名打牲他怎不與我便去稟葉大人知道後本職回還參見不期本官嗔怒喝令軍牢揪倒要打是鼎分說不知有何罪犯有本官自行將棍亂打等因又據開平衛指揮劉俊呈稱亦於本日有內官黃整發放俊說我着

百戶王鑑來問你要五箇新軍使用怎麼不與我你却將脩守等項軍犯與各官做軍伴不繇分說喝令軍牢要打一百等因備繇轉呈到職行間准欽差內官黃整手本爲軍務事內開景泰五年十二月十六日到馬營操練于教場內見得官軍數少隨取各隊揭帖看得協同指揮王鼎名下役占軍人五十二名其把總指揮劉俊名下役使軍人一百五十餘名欲將本官責罰其王鼎劉俊抗拒不伏撒潑毀罵等因准此續又准本官手本爲抗拒不伏等事內開前因

若不具題誠恐一槩倣倣警急難以調度除具
題外手本知會准此案候間今該前因行據守
備赤城都指揮鄭祥呈依奉行據馬營各把總
管隊等官指揮方整等呈體勘得云云備繇同
執結具呈得此照得臣先據指揮王鼎等轉呈
被內官黃整責打等情及內官黃整手本開稱
王鼎等抗拒臣在龍門衛公幹因見係干守邊
內外官員彼此交構各執一面情詞次日回至
赤城卽欲調取王鼎等前來審量事情輕重虛
實責罰發落當又續准黃整手本內開具題去

訖爲照旣已具題不敢擅自發落合候 聖斷
施行因將前後情詞俱各停候在案後臣密切
體訪審勘前事無有重情面會黃整已嘗調和
勉勵其王鼎等來見則又戒飭禁制近又該臣
等奉命出境殺賊回軍於廈見嶺境門內駐劄
其黃整因見王鼎軍前頗效微勞躬持酒肉犒
勞別無猜嫌今該欽遵體勘前因查黃整平日
在邊與臣等同心協力辦事止是一時稍迫未
能待下以寬其王鼎武夫亦係得力將官止是
一時不曾心悅誠服不能事上以禮是以交構

情詞未免皆有過當別無重情伏乞

聖裁施行謹題

景泰六年正月二十六日

題爲走回人口事景泰六年三月二十五日申時
據守備獨石都指揮張傑等呈本月二十四日
未時分據提調整臺開平衛指揮丁堅呈備管
整百戶杜成甫呈該鎮遠大整瞭高夜不收劉
政報本日午時瞭見境外男子三人騎牽馬六
匹到整說稱我是走回人口當就拆牆放入連
人呈送到職會同守備叅將周賢審得一名任

景玉年三十歲係山西太原府太原縣新村都
民人任賢男蒙本縣僉充都察院皂隸跟隨四
川道申御史正統十四年八月十五日在於土
木被也先部下達賊兀豚帖木兒搶去一名李
莊兒年二十一歲係直隸隆慶衛榆林驛軍人
李信下男正統十四年十月內在於北京高麗
馬房被兀良哈達子謠哈台搶去一向跟隨住
坐景泰二年十月內偷騎馬二匹脫走行至中
途又被也先部下兀豚帖木兒連馬搶住一名
楊帖木兒年二十四歲係陝西寧夏高橋兒土

軍楊二男景泰元年正月初八日在於本處地方門城放牛亦被也先部下兀豚帖木兒搶去俱在不知地名住過景泰六年三月十九日各賊那營到于大沙窩各人思想家鄉商議偷騎馬七匹逃走中途殺喫一匹行走六日到邊又說跟隨各賊頭目是也先部下毛那罕平章博羅罕平章見今扶着脫脫卜花王的娘子與六歲的兒子在營裏人馬約有一二萬常被兀良哈人偷他馬匹數多以此怕他近日與他合火住了有兀良哈頭目革干帖木兒并阿羅反常來

王子娘子兒子并毛那罕等前面聽發放說要青草長時去與阿刺忽知院廝殺及據各人騎來馬匹自行照例貨賣訖叅照各人被擄年久今脫走回所言未委虛實又恐中間別有虜情除行內官黃整陳莊協同守備指揮吳良知會及行各堡守備都指揮等官整搦軍馬聽候調用仍嚴督沿邊腹裏整臺敵堡官軍人等晝夜用心嚴謹瞭望隄備遇有緊急相機行事并行宣府軍兵等官一體行屬隄備外謹題

景泰六年三月二十五日

題爲來降夷人等事景泰六年三月三十日午時
據守備龍門所張壽呈本月二十九日夜五更
時分據提調墩臺把總指揮王忠呈本夜二更
據管墩百戶張榮呈該孤石口墩瞭高夜不收
宋永祥等走報本日酉時分瞭見境外瓦房溝
達賊一人騎牽馬二匹從東往南行走離墩約
遠五里隨放砲一個射打本人近墩叫我是好
人見無隨身器械拆牆放入連人呈送等因素
查先據守備獨石都指揮張傑等呈爲烟火事
本月二十五日夜四更時分據提調墩臺指揮

曹旺呈據管墩百戶楊興呈備平戎墩瞭高夜
不收陳貴走報本日夜二更時分瞭見境外磚
牆見迤東火光一處又瞭見大松林迤北火光
一處離墩各遠一百餘里未曾息滅具呈本日
申時分又據張傑等呈爲走回人口事本月二
十八日未時分據提調墩臺指揮丁堅呈據管
墩百戶趙忠呈備鎮門墩瞭高夜不收馬頑驢
走報本日午時分瞭見境外步行二人近墩隨
卽放砲一箇本人叫說我是走回人口當就放
入連人呈送等因又據守備雲州堡王榮等呈

本月三十日五更時分據提調墩臺指揮徐啓
呈備管墩百戶李敬呈備守陸文衝墩瞭高夜
不收軍人王圯走報本月二十九日夜二更時
分瞭見境外火光一處離墩約遠一百餘里未
曾息滅各具呈到職已經節行隄備并案候聞
隨各據送到夷人并走回人口前來會同守備
叅將周賢審得一名孛羅年二十五歲係遼東
女直人景泰元年在本地亦刺的地方被脫脫
不花部下達賊把禿不花知院搶去一向隨賊
在于曲綠地名住過失記月日被也先殺散復

搶在于孛羅平章處隨住爲因過活艱難于本
年三月二十二日夜偷騎馬二匹脫走了七
日到邊在營時見得達賊約有三萬餘人三個
頭目過活十分艱難常被兀良哈賊偷了馬匹
又說怕南朝人馬征殺常時防備等因一名白
咬住年一十四歲係開平衛後所千戶白四侄
有叔父見在府軍前衛帶俸正統十四年七月
內在于雲州龍門口庄上被阿刺知院部下達
子把禿搶去在于不知地名住過因見達賊那
營不記日月脫走回還婦女一口脫脫碗禿年

二十五歲係也先部下達子兀言帖木兒妻有夫因被阿剌知院殺散被兀良哈達子搶去隨住思得艱難不記月日逃走行至中途遇見白咬住一同商議往南行走到邊據供得此除孛羅騎來馬匹瘦乏自行照例貨賣訖叅照白咬住被虜年久走回孛羅并脫脫碗秃係來降夷人及看得孛羅并脫脫碗秃語言動靜俱各伶俐垂覺中間恐有別項虜情況今東作當興各堡連日節報煙火數多防範之策不可不嚴除行內官黃整陳莊協同守備指揮吳良知會及行各堡守備都指揮等官整搦軍馬器械糧炒聽候調用嚴督沿邊腹裏墩臺敵堡哨守官軍人等晝夜用心謹慎瞭望遇有大小聲息聽探的實星馳飛報以憑相機行事并行宣府總兵等官一體行屬隄備外謹題

景泰六年三月三十日

題爲勦殺達賊事景泰六年三月十六日承准兵部照會前事要將提督守備獨石等處右叅將都指揮僉事周賢所造殺賊功次冊再行從實將擒殺賊級官軍人等逐一體勘明白果有不

當開報就便盡數除去將着實有功之人照依原擬奏事理重別造冊要見何人生擒何人斬首何人爲首何人爲從明白造冊繳部等因承此行據馬營等城領軍出哨都指揮等官王林等各將依奉重別從實逐一明白體勘到各項官軍職役姓名并先據各官呈該簡舉差錯改正等項緣繇同不扶結狀粘繳到職除審覆相同存結備照并造冊繳部外臣切惟景泰六年正月十六日我軍于龍王堂西殺賊彼時官軍人等上有宣府總兵提督等官奏奉出境殺賊

之命下有各官分調路道刻定期約及臣等奉行之令甫出境門便遇強敵而此賊招呼醜類敢抗王師蓋在彼勢不相容在我兵非得已以此憑仗朝廷威靈將士心力致有殺獲成功已經具題去後今該前因臣按原冊并今重別從實體勘得軍馬出境之時南北二哨分行南哨官軍正於龍王堂西遇賊廝殺數內生擒斬首被傷官軍指揮張順等八十四員名委的俱係當先有功員役若是擒斬一人一級止以一人爲首功則啓爭奪賊人首級之弊軍前壞事

他日之憂故臣具以前項官軍爲首其都指揮
王林等六百四十九員名亦係當先有功之人
蓋用兵之際必須大勢人馬衝入賊陣殺敗賊
衆方纔得以下手擒斬只因該部叅駁累以人
衆爲言故臣以前項官軍爲從查指揮王鼎李
石都指揮王林鄭祥俱身先士卒內王鼎設謀
引路功尤足稱特以其爲領軍頭目不曾報在
擒斬之列其北哨官軍指揮安全等一千七十
四員名雖是不曾遇賊俱係敢勇精兵遙振軍
聲不爲無助出境之勞則一遇賊之時適殊故

臣亦以前項官軍爲從策應官軍叅將都指揮
夏忠等六百八十員名遠道赴期兼程莫及班
師之日遇而同回緣臣與內官黃整叅將周賢
兵臨境外誓師之際委曾號令將士一人用命
衆人同功一人悞事衆人同罪故臣今次冊內
官軍未敢除去至于陞賞與否與夫陞賞之輕
重伏乞 朝廷看詳上項備列緣繇斟酌等第
恩出于上量與定奪庶幾臣等不負號令向
後可以使人再照先承准兵部照會該巡按御
史張鵬具奏要將前項官軍陞賞本部議擬奏

准內開臣姓名以爲前項功勞合候履勘至日另行奏請定奪一節切臣以書生叨忝守邊督軍殺賊區區職分曷足言勞况臣不佞心雖切于圖報上德志不在于受賞邊功當陛下偃兵息民綏懷夷狄之時萬一以邊功受賞則是臣愚不能欽承將順掠美貪功私心未安輿論不協故敢先事陳情惟

陛下照臨之不勝幸甚謹題

景泰六年四月

題爲給繇事准本布政司咨內開臣係本司管理

糧料官員例該支俸辦事牌冊齋繳除照例將任內收過糧料草束數目并應該造報事蹟依式類造須知并功蹟功業牌冊完日具本差人齋進外今將例不該造軍馬等項備開回咨徑自施行等因准此案照先爲鎮守巡撫等事承准吏部照會該臣題前事合無照依協贊事例于四月初一日到京議事就于初十日考滿給繇惟復另行給繇等因具題該本部官節該欽奉

聖旨着四月議事來就給繇欽此照會到職欽遵已

將臣任內該造牌冊事蹟取勘移咨本司類造
去後景泰六年三月初一日又承准兵部照會
爲總督邊儲等事該本部擬奏臣所管地方節
報達賊出沒差人舖馬齋文與臣令照舊在彼
且不赴京議事該本部官欽奉

聖旨是欽此照會到職欽遵今該前因除本司照例
齋繳牌冊并臣照例自景泰六年四月初十日
三年考滿以後仍前支俸辦事外今將任內獨
石等八城堡軍馬等項數目開坐具本
官軍一萬四千八十三員名

馬六千四百六匹

糧料五十七萬七百七十六石一升五合三
勺

草六萬三千七百五十五束

景泰六年四月初十日

題爲聲息事景泰六年四月二十日酉時節該欽
奉

勅卽將差來各項虜使再三研審是何部落務在得
實星馳奏報欽此會同守備右叅將周賢查得本
日巳時該委官指揮李實回報事情本日午時

又該兵部照會前事本日又該虜使哈達赤城館待所說語言俱已節次具題去後今奉前因又據臣等先差諳曉夷語軍人并指揮王鼎等回報欽遵研審得後起虜使皮兒馬黑麻等內各人說稱有原係也先部下頭目孛羅平章毛那孩平章猛可平章將阿刺知院人馬殺散了將寶奪了又將脫脫不花王兒子娘子并也先的娘同他娘子兩箇兒子都搶在身邊又搶了九個白毡帳子今孛羅差我每來有好的言語到朝廷纔說回去時還與阿刺廝殺務要殺

他敗纔罷又先依奉抓緝得前起虜使哈達等一十三名內一名原係劉僧太監家人漢語潛地說稱土木搶去原在也先部下有也先因阿刺知院去殺他時被他自家部下的人殺死了有寶原在他娘子處因亂跟了孛羅平章走脫見在不曾在阿刺處奪來今孛羅人馬家小約有二三萬多半行走牛馬瘦少車輛全無伯顏帖木兒同互通實罕老小人馬約有一二萬見在西邊孛羅常有信去要待青草長時會合與阿刺廝殺阿刺人馬約有五六萬見在北邊牛

羊車輛都被他得了想必青草長時也要來與
孛羅廝殺料必孛羅殺他不過如今孛羅的人
見在涼亭一帶林子裏藏住十分艱難沒喫的
火子裏自家偷馬殺喫人馬也有餓死的又兼
日夜驚慌前面後面都怕人去殺他不得已假
進貢報喜爲名一則討衣食養活一則止軍馬
殺他又聽得脫脫卜花的兒子見在營裏要照
舊扶他做王等語通行回報得此臣等參照所
報事因雖虜人多詐未委虛實大槩劉僧家人
之言或有着實真情其虜使之言多是粧點浮

誇譎辭大話虜情關繫不敢隱畧謹題

景泰六年四月二十一日

題爲收留馬匹事據守備獨石張傑等呈景泰六
年閏六月二十四日未時分據鎮門整瞭高夜
不收姜景和報本日午時瞭見境外東北山有
青白空馬二匹離整約遠二里往南行走等因
得此蒙差夜不收官軍百戶王俊等前去本整
抵見前項馬匹在於長城脚外水門東邊喫草
隨即收趕前來等因具呈得此會同右叅將周
賢等議得節據走回人口說稱兀良哈殘賊離

邊不遠或言馬上半日可到或言一日可到又
先據韭菜南等整節次瞭見或三塊或五十隊
或約有幾百人皆是此賊先該 聖恩寬大許
其二百里外牧放今却指此爲繇託名圍獵不
肯遠去往來出沒卽如前項收留馬疋虜情多
態雖不可定以意度之或是那營往來一時走
失或是設伏下賄引誘我軍蓋此賊向來雖云
散漫各邊俱有但臣等地方名爲口外數內赤
城龍門衛所俱是往時犯邊大路獨石馬營二
城孤懸在外況今耕牧在時人畜徧野馬營精

兵一枝其有水草場俱在城北見今牧放馬羣
咫尺邊牆之下長臆活命全靠此時不得拘收
置之他處臣等愚見今日虜賊其醜類仇殺未
已所謂大舉入寇目下或未必然惟此種殘賊
最號強勇向來互相趕殺又最艱難切恐聽其
近邊日深月久狼子野心不顧恩信或俟朝暮
空隙或乘嵐霧晦冥或奔庄曠或撲牛馬鼠竊
狗偷旋復散去雖爲小患亦必驚疑人心臣等
目前之慮此爲最先若不先事懇言萬一不虞
言之晚矣伏乞 聖明勅該衙門詳議指示長

策合無於兀良哈等衛有何使臣回日請勅頭日朶羅干革干帖木兒等令其遵守先次勅旨遠去二百里外若再故違邊將必不相容則是自取罪愆並非朝廷失信如此庶幾奸黠知懼邊境可寧所據前項收留境外自行走來馬疋合無就于本處給軍騎操發屬喂養聽候并通行各城守備等官嚴督沿邊腹裏整堡晝夜十分加意隄備人畜瞭望聲息一面整柵人馬專候有警調用及行宣府總兵等官一體施行外謹題

景泰六年閏六月二十六日

奏爲謝恩事景泰六年閏六月二十八日該戶部差進士王昇賚捧欽賞銀二兩采段一表裏賜臣者照得先該兵部奏准照會令臣查勘龍王堂西勦殺達賊有功官軍造冊繳報等因已經欽遵將比先奉命出境殺賊根因及有功官軍等第并臣不敢受賞情繇備詞具題去後今該前因伏惟

皇上明竝日月恩同天地臣強顏拜賜之餘第深感激不敢再有辭免以黷天聽所有上項賜物

白金文綺謹已祇受嚮 闕謝 恩訖謹奏

景泰六年七月 日

葉文莊公邊奏存藁卷六

葉文莊公邊奏存藁卷七

吏部左侍郎謚文莊崑山葉盛存藁

孫衡州府同知 夢淇較定

六世孫禮部主事 重華彙梓

題為烟火事景泰七年正月十五日午時據守備

馬營都指揮使王林等呈據提調邊墩指揮程

通呈據守樺皮嶺墩百戶王成呈備瞭高夜不

收王二哥走報本月十四夜一更時分瞭見境

外迤北長海子火光一處離墩約遠九十餘里

備報具呈案查本月十四日申時該據王林等

呈備守雷山墩百戶郭六兒呈備本墩守瞭夜不收張榮走報本月十三夜四更時分瞭見境外興和迤北火光一處離墩約遠一百餘里備報具呈得此已行隄備去後今呈前因會同守備右叅將都指揮僉事周賢議得前項節報烟火合當加意防範除行內官黃整等知會嚴督各城守備等官張傑等整棚軍馬器械糧炒齊備聽候調用緩急相機行事及行宣府總兵等官一體施行外謹題

景泰七年正月十五日

題爲聲息事景泰七年正月二十二日辰時據守備馬營都指揮王林等呈據提調邊墩指揮程通呈據守威遠墩百戶梁貴呈據本墩瞭高夜不收趙秀一報本月二十一日申時分瞭見境外西北達賊人馬一百餘騎離墩約遠一十餘里本墩隨放鐵砲一箇各賊往東去訖備報具呈得此會同守備右叅將周賢查得近該萬全右衛地方節有賊寇往來雖賊情譎詐不測大率多是三衛殘寇除照依該部近日查奏永平山海等處舊例施行并行內官黃整等知會及

各城守備等官整棚聽調及沿邊腹裡地方墩堡哨守官軍人等晝夜用心加意瞭望隄備并行宣府總兵等官知會一體施行外謹題

景泰七年正月二十三日

題爲緊要邊城急缺官員事據雲州城管新軍正千戶汪宣等呈據已故新軍杜友妻陳氏告稱被協同指揮沙泉喝令軍牢用樺木大棍亂打傷重氣絕身死等因又據鎮撫汪海口告審供得守備王榮協同指揮沙泉等沉醉到於已故新軍杜友停屍處所親自手執藤棍往來街市

打人將伊責打五十餘棍等因行間又據王榮呈有千戶汪宣暗令杜友妻在於各職門口叫罵等因據呈得此會同叅照雲州城係是獨石馬營根本地方往年壞事實繇此處脩復以來原守舊軍十不存五近因軍少奏准但係新編發來充軍并脩守哨犯人俱各收發以實本城另設管新軍官管理緣前項軍犯俱是謀叛妖言強盜人命三犯竊盜奸欺詐僞小人挨門攘寇無日無之越城脫走不虛旬日舊軍數少新軍數多地弱客強臣等所慮爲守備等官者

所當鎮靜防微尚慮生變乃敢酷暴淫酗又且
上下之間猜忌嫌疑自分彼此俱屬違法除已
處治并查照備行都御史李秉施行外緣王榮
沙泉汪宣俱難任用況王榮等事干人命係聽
候拏問另行定奪人員而雲州地方軍犯實爲
緊要不可頃刻缺官管理鈐束合當急爲處治
臣等公同推舉得開平衛指揮張琥保安衛指
揮程道俱各相應前項地方任用乞 勅該部
計議合無行令張琥程道二員守備雲州城其
管新軍正千戶粹難其人及照口外如龍門千

戶所往來俱是指揮掌管所事合無就令指揮
程道不妨守備本城仍掌所事再照協同守備
吳良見今分守獨石往來提督各城查獨石已
有內官黃整凡事已有定規合無令吳良帶領
隨操二隊前來分守雲州照舊往來提督庶幾
事體合宜彼此兼濟軍犯知懼而地方不致疎
虞謹題

景泰七年二月十日

題爲災異事會同守備右叅將周賢照得景泰七
年六月初十日早五更時分地震房屋動搖天

邊奏存身 卷七
明詢及多人稱初發之時有聲自西北而來隨
詢及各墩堡皆然又有長安嶺地方墩塚倒塌
等因臣等愚昧不識占驗除警勵飭備外遵奉
皇上卽位之初正統十四年十二月初十日詔書內
事理奏聞謹題

景泰七年六月初十日

題爲寬恤等事據赤城守備鄭祥等呈據周源等
連名告係立功等項軍職各先因爲事蒙巡按
御史等官并在京法司問發口外等處立功哨
守等項一向在邊不缺今於景泰七年六月初

四日節該奉

勅諭寬恤恩宥事理內開軍職官有犯罪發立功哨
守等項 勅書到日各還原職其犯科斂害軍等
項者止令帶操不許管軍管事欽此除欽遵外緣
源等俱係軍職官爲事蒙發立功等項乞爲轉
達照依恩宥事理復職等因具呈得此會同守
備右叅將周賢叅看得各告并查原發立功守
哨兩項內除周源等原係口北懷安等衛官員
其仇英等俱係別處都司衛所官員衙門俸糧
合當定奪及照楊林陳廣等係是脩守并充軍

哨守等項名目緣 勅諭內止開立功哨守等
項字樣不曾備開前項名目未識應否照依恩
宥復職臣等不敢擅便定奪除備查各人原發
粘連轉行兵部外乞 勅該部查照定奪以憑
遵奉謹題

景泰七年六月 日

題爲蓄積邊儲事據孫榮等告各年甲不齊俱係
官下軍民人等各告給文引買賣遇蒙戶部榜
例開中口外鵬鶚堡等倉景泰七年分存積淮
浙鹽課其鵬鶚堡倉每淮鹽一引粟米九斗亦

城廣備倉每淮鹽一引八斗五升雲州馬營獨
石三倉每淮鹽一引俱粟米八斗榮等遵依赴
官告報鵬鶚堡倉淮鹽前往口南蔚州大同等
處糴米運送前來該倉上納爲因蔚州等處相
離鵬鶚堡地方程途寫遠山路崎嶇車脚艱貴
每米一石并脚費共用銀七錢有餘每思景泰
三年并景泰五年赤城龍門等倉開中淮鹽每
引米豆止是四斗五升後因上納人少又行減
作四斗三升其景泰六年分赤城廣備倉存積
淮鹽每引止該七斗五升雖有報中之人而實

行上納者少經今二年不能完足兼今口外地
方霜早薄收米糧價高斗頭添重若不狀告實
是有傷資本進退兩難乞爲轉達量減斗頭便
益等因具告案照先奉節准提督都御史李秉
照會已經通行去後今告前因叅照孫榮等所
告景泰六年赤城等倉鹽糧比之先年斗頭添
重延今不完今次鵬鶚堡等倉鹽比之景泰六
年又加添重况口外等處霜早薄收米價高貴
俱是實情又兼獨石馬營等處准鹽并各倉浙
鹽雖曾開例爲因程途既遠斗頭又重未經報

中查口外獨石廣積等八倉先年糧料共七十
萬零今年七月終實在糧料止五十五萬零數
內馬營廣盈倉并鵬鶚堡倉糧料尤爲數少未
勾蓄積正係緊關用糧之時若不照依先年事
例將前項鹽糧量減斗頭誠恐日久難完不敷
支給臣叨忝邊寄糧餉至重不敢避嫌坐視伏
乞 聖明特 勅該部查照前例從長計議將
景泰七年鵬鶚堡等五倉鹽糧量減斗頭惟復
通將景泰六年赤城馬營二倉鹽糧未完之數
一體量減庶得鹽糧易完邊儲有積今將各倉

相離路程遠近數目開坐謹題

缺糧倉分五處

鷓鴣堡倉在長安嶺迤北離嶺四十餘里

赤城廣備倉在長安嶺迤北離嶺八十餘里

雲州堡倉在長安嶺迤北離嶺一百一十餘里

馬營廣盈倉在長安嶺迤北離嶺一百四十

餘里

獨石廣積倉在長安嶺迤北離嶺一百六十

餘里

景泰七年八月二十六日

題爲聲息事照得協同守備呂貴見奉兵部奏奉

欽依內事理取回赴部去訖緣本官原係奏准

協同守備官員其獨石密邇邊陲連日接報聲

息不絕邊事緊要不可缺人除聲息另行外會

同右叅將周賢等查得本城操備隆慶左衛指

揮使朱通公廉質直善撫軍士在邊年久曾經

守戰堪以任用乞 勅該部計議合無將本官

代替指揮呂貴協同守備獨石共濟邊事謹題

景泰七年十月十三日

題爲陳言 聖德開廣言路等事恭惟我

皇帝陛下 聖德高厚廣大等于天地難可指名以

臣觀之則求言納諫一事尤爲

陛下盛德之首伏覩

陛下卽位以來屢下 詔書及災異求言 勅旨旣

曰許諸人直言無隱又曰許諸人直言極諫拳

拳切切以直言下望於羣臣以及軍民微賤此

蓋

陛下盛德遠法堯舜湯禹聖賢之君近法我

太祖

太宗

仁宗

宣宗列聖之德也今四夷賓服萬方乂寧何莫非

陛下盛德之效哉臣風聞得郎中等官章綸等近以

言事被繫未釋臣遠在邊方不知章綸等所言

何事意者各官列職朝行受 國厚 恩其所

言或不過 詔書所謂朝廷軍民中事有未宜

及利有當興害有當除等事但章綸等或係新

進或非言官草野之臣螻蟻之見不明聖賢大

道不識 朝廷事體豈無非所當言而言者乎

陛下寬待優容不卽加罪此固可見

陛下之盛德矣然猶令其在獄臣亦固知

陛下之意無他不過欲其悔罪省愆改過安分而保

養玉成之爲 國家將來用耳此尤足見

陛下聖德之所以極其盛也雖然臣又竊嘗爲

陛下思之章綸等愚戇無狀罪過難辭然繫獄日久

未荷 天恩臣恐天下之人不能家喻戶曉旁

觀私議或者以爲章綸等發落與 詔書 勅

旨所喻稍異則于章綸等初無損益而 朝廷

未免有厭惡直言之謗豈惟言者將懷自全之

計而緘默無聞亦豈不足以上累

陛下始終之盛德哉臣一介寒微過承 寵命備員

臺諫亦既有年感恩思報夙夜虔切以此願竭

狂瞽少效萬分之一伏望 聖恩憐憫留中一

覽俯垂採納必如舜禹之于違汝弼必如武湯

之從諫弗拂必如我

太宗皇帝之超擢言官而其後知府何忠之得以節

死都御史羅通按察使等官柯暹黎恬等之得

爲後日之用如

仁宗皇帝之寬容言者弋謙一詔實錄有光如

宣宗皇帝之不罪直言而李時勉得以榮名令終如
陛下龍飛之初之風厲言路而劉球之贈謚萬世同
休則言路開廣社稷之福而

陛下之盛德無窮矣臣雖瞑目有榮幸焉臣愚不勝
惓惓具本

景泰 年 月 日

奏爲褒恤事臣惟 聖人爲政以仁斯忠厚之道
所繇立賢否死而後定斯褒恤之典所繇行夫
臣子之賢本自常分朝廷必加之意而有所褒
恤者蓋所以伸公論慰幽魂亦以勸不賢而至

于賢一歸于忠厚而已切聞前宣府等處總督
邊儲叅贊軍務兼巡撫戶部左侍郎致仕劉璉
病故緣臣職在宣府等處監督收放糧料蒞任
之日今總督都御史李秉照會臣管理出給勘
合等事以議定規格授臣曰此皆劉侍郎已行
之法無有不善我等守而行之斯可矣及見宣
府鎮守總兵等官亦皆往往稱述劉璉之賢其
言曰我等與劉侍郎同事日久深敬服之人或
有所干請未嘗有纖毫苟且徇從而人亦無怨
言以其所行皆公道故也又曰做官管事如劉

侍郎之公勤廉謹不愧俸祿矣因又訪之邊氓士卒無有間言蓋劉璉自爲御史累遷侍郎公勤廉謹始終如一其在宣府前後凡二十有八年各州縣衛所倉庫大小事務如收支糧草給散布花銀絹等項一一躬親理辦在官之物雖朽斷繩索破棄蓆片亦皆變賣錢物入官一無遺漏且恪有執持不畏勢要雖武夫悍將罔遵禮法之徒聞其名者無不懾服正統十四年逆賊侵犯路道不通之時劉璉與宣府守臣同心協謀斥去浮議嬰城固守卒以保全亦以劉璉

平日區畫周詳先事有備糧草充足人賴以安特因晚年衰老行邊墮馬傷足艱于動履精神不及防範不周以致比年查理邊儲所司以其老病致有出納情弊坐是被繫其後宣府總鎮大小衙門官員人等俱各連章合辭乞恩奏保廷臣亦以爲言伏蒙

皇上特宥其罪且令以原職致仕臣切論之所司之查理劉璉之獲罪朝廷之法也旣釋其罪仍復其官且安其老朝廷之恩也法未終而恩卽繼之

皇上恩禮 大臣遵崇故老其忠厚之澤一何以至
于此哉蓋士乏全材久矣取人之道當先大節
當原本心至于精神所不及防範所不周雖古
賢哲或不能免况其他乎又况劉璉亦嘗累疏
乞骸而近侍言官有言其持廉不貪不負付託
者內閣大臣有言其在邊年久老成可任不必
更替者此又皆臣目所及見繇此觀之 朝廷
忠厚之澤施之有自而我

皇上之大德明見萬代之偉觀也今劉璉既死而宣
府上下之人情一時之公論如李秉等所言如

此雖出于好賢讓德之心而劉璉之賢亦自可
見臣愚欲乞

皇上俯念劉璉邊境微勞積有年歲特 勅禮部于

常例葬祭之外如近年恩例或量與追贈或別
加優異使天下爲臣子者皆將曰賢如劉璉生
而 朝廷釋其罪死而 朝廷重其恩 朝廷
之待賢者如是孰不相勸于爲善哉則不特以
厭一時之公論荅宣府之人心其慰賢勞于既
死勸有位于將來多矣臣昔塵侍從今忝藩臣
感犬馬未報之舊恩遵直言無隱之 明詔遇

事當言不能隱默謹 奏

景泰 年 月 日

題爲陳情給假乞恩事臣一介寒微累受國恩歷任山西右叅政獨石等處管事臣有父封兵科都給事中葉春在厠籍直隸蘇州府崑山縣今年七十歲與臣面不相見已經九年臣於近日得鄉人張吉附到七月家書內言臣父氣喘咳嗽等病苦楚賴臣兄葉蓋等扶持奉養未得安痊昨又得鄉人孫恭武附到八月家書內言臣父於八月初轉加氣疼痰逆病重在床醫藥無

效臣父每言荷 國厚恩我死足矣但次子在任不得見面等語臣思父初娶湯氏生臣兄蓋後湯氏故娶臣母贈孺人陳氏生臣其湯氏係臣前母實生臣兄實同母道以臣未曾陳請恩命未蒙追贈今思在京在外官員三年考滿陳情請給封贈并乞贈前母誥命洪熙年間以來有布政等官蕭省身等請給不爲常例封贈該部覆請定奪欽蒙特准恩旨臣今歷任右叅政該於景泰六年四月初十日巳及三年節因邊事未得到京考滿未敢陳情卽今歷任將及五

年緣臣父今年七十加之前病沉重生死未保
言之痛心臣又蒙恩在邊不敢給假回還原籍
省侍但今備冬將過邊事稍寧已有提督軍務
并內臣叅將等官在任不致悞事臣欲乞 聖
恩憐憫合無令臣給假赴京考滿臣當以前情
另奏陳請誥命倘臣父未死之前得霑恩命過
於他日受賜萬萬臣之志願畢矣臣卽星馳到
邊辦事圖報

皇恩之萬一臣以父母之故人子之情不得已上干
君父罪該萬死俯伏俟命之至謹題

景泰七年十一月初十日

題爲守制事景泰七年十一月十二日臣在雲州

公幹本日戌時有表姪吳阿員送到家書內說

臣父封兵科都給事中葉春在原籍直隸蘇州

府崑山縣患病於本年九月初十日身故等因

照得本年十一月初九日家書內說臣父病重

臣已於本月初十日具題陳情給假乞恩去後

今又得家書知臣父已故臣係親男例應守制

緣臣奉 勅在邊不敢擅自離職暫行在任伏

候請 旨至日將卷籍等項咨呈右僉都御史

李秉處臣即日赴京順道回還原籍守制未敢

擅便謹題

景泰七年十二月十二日

葉文莊公邊奏存彙卷七

